

Dan planete Zemlje

Razvoj ljudske civilizacije usko je povezan sa prirodnim resursima Zemlje koji nam osiguravaju potrebe za zdrav život kao što su, na primjer, hrana i voda. Povećanje ljudske populacije dovelo je do prekomjernog iskorištavanja tih prirodnih resursa što predstavlja veliki problem današnjice. Nažalost, vodeći se za svojom dobrobiti, kao i zbog profita, ljudi su postali glavni zagađivači okoliša i doveli u pitanje opstanak planete Zemlje. Kada su onečišćenja postala prijetnja za zdravlje, počelo se intenzivno raditi na saniranju šteta. Obilježavanje Dana planete zemlje potaknuto je nacionalnim obrazovanjem javnosti o okolišu koje je organizovao senator Gaylord Nelson nakon katastrofalnog izlivanja nafte 1969. godine u Santa Barbari. Prvo obilježavanje organizovala je organizacija Earth Day Network u SAD-u 1970. godine, a službeno se obilježava od 1992. godine kada je tokom Konferencije UN-a o okolišu i razvoju u Rio de Janeiru usklađen program za promociju održivog razvoja.

Svaki put kada nam padne snijeg u junu ili bude trideset stepeni u januaru, trebamo se sjetiti da smo i mi krivi za to. Klimatske promjene su jedan od najvećih izazova koje potresaju svijet u 21. vijeku, a očekivano klimatsko zatopljenje u budućnosti je već sada veće nego što se predviđalo. Većina istraživača o klimatskim promjenama se slaže kako se već suočavamo sa neizbježnim povećanjem globalne temperature i kako je velika vjerovatnoća da su klimatske promjene već nastupile. Bitno je da naučimo da cijenimo ono što imamo i negujemo planetu Zemlju za sebe i buduće generacije. Postali smo sami sebi najveća prijetnja, ali još nije kasno da se suočimo sa svim problemima koje smo sami stvorili. Postoji mnogo načina kako možemo pozitivno utjecati na sebe i planetu Zemlju. Počev od malih stvari kao što je posaditi cvijet ili drvo i reciklaža smeća, svako od nas može napraviti nešto da poštedi planetu Zemlju. Trebamo znati da je puno malih koraka bolje nego jedan veliki. Često ljudi nisu svjesni da je ušteda vode i struje dio očuvanja okoline. Pored toga što štedimo novac, štedimo i planetu. Palmino ulje, na primjer, prvenstveno nije dobro za nas jer ima visok udio zasićenih kiselina. Pored toga, sječa palmi ima ogromne posljedice po planetu. Kupovina od lokalnih i malih biznisa je uvijek dobar izbor jer oni daleko manje zagađuju od velikih industrija. Pored svega ovoga što sami radimo, jednako je važno utjecati na druge ljude i da skupa širimo svijest o važnosti ove teme.

Dan planete Zemlje je podsjetnik da trebamo razmisliti o vrijednostima čovječanstva i problemima sa kojima se planeta suočava. Bitno je skrenuti pažnju na opasnosti koje prijete životu na Zemlji, kojeg ugrožavaju nekontrolisane količine otrovnih tvari koje se ispuštaju u atmosferu i prekomjerna upotreba fosilnih goriva. I za kraj citirati ćemo riječi Eva Moralesa: *“Prije ili poslije, morat ćemo shvatiti da i Zemlja ima svoja prava, na prvom mjestu pravo da živi bez zagađenja. Čovječanstvo mora biti svjesno da čovjek ne može živjeti bez Majke Zemlje, ali da planeta Zemlja može živjeti bez čovjeka”*.

Amina Kurtović